



ITY TANY ITY FANDALOVAM-BAHINY

Ry Kristianina havana, efa manakaiky ny famaranana ny taona litorjika izay mampianatra antsika hahay hibanjina sahady ny hoavy, hahay hiomana amin'izay hoavy izay satria fandalovana tokoa ity tany ity. **IMBETSAKA IZAHO NO MILAZA FA ANIO NY HO AVY FA TSY RAHAMPITSO** izany hoe araka ny fiainantsika amin'izao no fiainantsika amin'ny ho avy. Ny hira ataontsika matetika rahateo dia anehoantsika izany: ny entim-belona no enti-maty, ny entim-belona no hitsarana...Tsy ity fiainana ity

izany no fiafarantsika fa fiomanantsika amin'ny tena fiainana ary fantantsika fa amin'ny maha-voaary antsika dia tsy maintsy misy fiafarana. Andriamanitra irery izay mpahary no tsy misy fiafarana ka noho izany dia misy farany isika olombelona. Izany indrindra no tian'ny Eglizy ho tsapantsika amin'izao Alahady faha-32 mandavantaona izao.

Vakiteny I : Fah. 6, 12-16
Tononkira : Salamo 62
Vakiteny II : 1 Tes, 4, 13-18
Evanjely : Mt. 25, 1-13

Ampianaran'ny Eglizy àry isika amin'ny alalan'ireo vakiteny handalina tsaratsara kokoa izay voalaza izay ary hifikitra amin'izay tena fahendrena marina dia ny fahendrena izay tsy inona fa ny fahaizantsika mijery ny hoavy. Izany no mahatonga antsika matetika mamerimberina hoe niany ny hoavy fa tsy amaray. Raha haintsika tokoa ny mametraka izao andro iainantsika izao dia izay ataontsika amin'ny andro iainantsika izao no tsy maintsy hanomanantsika ny hoavy, izany hoe raha mieritreritra ny hoavy isika ka tiantsika ho feno hafaliana, ho feno hasambarana, ho feno fiadanana

izany hoavintsika izany dia dieny androany no tsy maintsy mamolavola hoe:"Inona marina moa ny fiadanana ho ahy, inona ny fahasambarana ho ahy, inona ny lamina mandrakizay ho ahy ?"

Izany no ezaka ataontsika miatrika izao Sinaody faha-7 izao hanampy antsika hanomana dieny izao ny ho avy na ara-panahy na ara-tsaina na ara-batana izany hoe hametraka fifandraisana araka ny vôkasiona noharian'Andriamanitra antsika : fifandraisana amin'ny zava-boary, amintsika samy isika, fifandraisana amin'Andriamanitra ao anatin'ny fihavanana marina, fihavanana araka ny nampianarin'I Kristy mandavorary ilay soatoavina mamintsika. Irina manomboka izao ny hahay hihavana marina amin'ny zava-boary ka hahay hiaro sy hikorokoro, hanana fihetsika "ekolojika" manomboka amin'ny tsaiky ka hatramin'ny lehibe.... Torak'izany koa noho izany fihavanana sady kristianina no Malagasy izany dia miroso amin'ny fifanasoavana sy fifampitsimbina mikatsaka ny soa iombonana manarina ny Tranobe lombonana. Farany noho ny fahasovan'Andriamanitra dia mihavana ny tany aman-danitra ka zary fianakaviam-ben'Andriamanitra, Oloaraiky Isika Jiaby, Fratelli Tutti midera sy manome voninahitra an'Andriamanitra miaraka amin'ireo havantsika efa tafita sy ny anjely rehetra.

Tsy araka ny hevitr'izao tontolo izao no ahafahantsika mibanjina izany rehetra izany. Mila mitoetra ao amin'ny fahendren'Andriamanitra. Ny tena fahendrena dia ny fahaizantsika mandinika an'izany rehetra izany, ary tsy hoe mandinika fotsiny fa mandrafitra an'izany dieny izao. Arakaraky ny fahaizanao mandrafitra an'izany hoavy dieny izao izany no ahafahana ihany koa miditra sy miaina ary mivelona dieny izao na dia tsy lavorary aza ny fiadanana sy ny hasambarana ary ny hafaliana.

Ry Kristianina havana, ny foto-pampianarana tian'ny Eglizy atolotra ho antsika amin'izao Alahady faha-32 mandavantaona izao dia tafiditra tsara amin'izao sinaody izao araka ny voalazantsika. Ny tanjona dia ny hahatonga antsika ho Kristy mpiara-belona amin'olona. Raha feno an'I Kristy tokoa isika dia manomana an'izany fiombonana tanteraka amin'i Kristy izany sy ny fiainan-ko avy, hany ka zary Kristy Mpiara-belona amin'ny olona eto an-tany. Efa santarintsika amin'ny fivelomana ny maha-Kristianina antsika ny fiainana miaraka amin'i Kristy amin'ny hoavy ka hahatonga ny olona hahatsapa fa izany tokoa ny lalan-kombana satria i Kristy no làlana sy fahamarinana ary fiainana. Izany no ambaran'ireo vakiteny androany ary izany no tena fahendrena.

Ny vakiteny voalohany ao amin'ny bokin'ny fahendrena manambara hoe: "*ny fahendrena dia mampiratra, tsy mety matroka hatsarana, mora mahita azy ny olona raha tia azy, ary mora mahazo azy raha mitady.*" Izany no mahatonga antsika dieny izao mivelona ny hoavy satria raha mitady an'i Kristy izay fahendrena satria Izy no làlana dia tsy ho very na oviana na oviana izay miaraka Aminy satria afaka mivahatra Aminy izy izay fahamarinana ka afaka mahita fivelarana noho izy fiainana, hasambarana. Izay mahita ny làlalan-kombana sy mahita ny marina no hendry, mahita ny fahasambarana. Izany no harena sy fiainana, i Kristy no fiainana, ka ny mahita ny fiainana tena izy miaraka amin'i Kristy no tena mahita ny harena sy hasambarana.

I Jesoa ao amin'ny Evanjely raha nanao ny fanoharana mikasika ny virjiny hendry sy ny virjiny adala dia mananatra antsika hahay hametraka ny hoe niany ny hoavy raha mahay mikorokoro sy mikarakara ny fiainantsika sy ny tranobe iombonantsika isika. Izany no mahatonga antsika mamerina matetika ilay hafatra tamin'ny JMJ mbola tena manankery fa indrindra amin'izao Sinaody faha-7 izao ho génération mpanorina fa tsy mpandrava hitantsika izany androany amin'ny Evanjely.

Ny virjiny adala dia varimbariana amin'izao fiainan'izao tontolo izao ka mandrava, potika ny solika teny an-tànany, izany no hitantsika amin'ireo doro ala sy tevy ala ataontsika. Varimbariana amin'ny androany isika ka manapotika hany ka rehefa tonga ny fotoan'ny haintany izay vao mitolagaga. Indrisy efa migadra ny ho avy amin'izay ka zary feno nenina ny fiainana.

Ny virjiny hendry kosa dia ny génération mpanorina izay tsy mitsahatra mikarakara sy mikolokolo ny manodidina azy ka rehefa tonga ny mpampakatra dia ao anatin'ny hafaliana izy.

Raha tadidinareo dia toy izao ny fanontaniana niverimberina tamin'ny Sinaody fijanonana faha-2 mikasika ny tontolo iainana : “tontolo iainana, diosezy manao akory no apetratsika ho lovan'ny taranaka amam-para?”

Inty ny valinteny : aoka ho “Virjiny hendry” isika ka manomana ny “solika” izany hoe harenintsika ity tranobe iombonana.

Aoka ho mpamokatra, ho mpanorina isika fa tsy mpandrava, ho mpamokatra araka izay sitrak'Andriamanitra fa tsy araka izao tontolo izay entanin'ny fitiavan-tena ka tsy mizaha ny hafa izao. Izany dia mbola manohy ny hafatra tamin'ny Alahady lasa teo, ho mpanorina anie isika fa tsy mpandrava na mpanakorontana, tsy mpanao herisetra na mpanapotika fa kosa ho mpanarina ka raha tonga ny mpampakatra dia mitsangana avy hatrany ny hendry. Io no lazaintsika hoe izay manao ny marina no hendry ary ny fahamarinana no maha-olona afaka antsika.

Ry Kristianina havana, aoka àry isika hahay hanararaotra izao fiainantsika izao, fanorenana fa tsy hoe sanatria fanararaotana hanapotika araky ny hevitr'izao tontolo izao. Hitantsika ireo virjiny adala varimbariana fotsiny, koa aoka isika hikarakara dieny izao ny fiainan-koavy.

Manafatra antsika i Md Paoly ao amin'ny vakiteny faharoa, taratasy ho an'ny Tesalosanina, mananatra antsika izy mba tsy ho varimbariana : " *Ry kristianina havana, tsy tianay ny tsy hahafantaranareo ny amin'izay efa nodimandry, sao dia malahelo toy ny sasany tsy manampanantenana koa ianareo. Fa araka ny inoantsika an'i Jesoa ho efa maty sy nitsangan-ko velona no hitondran'Andriamanitra an'izay nodi mandry hiaraka aminy koa, amin'ny alalan'i Jesoa.*" Raha dieny izao isika ry Kristianina havana no mivelona ny finoantsika izany hoe ny fiainantsika manontolo no fiainana miaraka Aminy sy amin'ny alalany ary ao Aminy dia efa mitondra antsika sahady amin'ny fiainan-ko avy izany. Io ilay solika izay tsy mety lany ary fantantsika fa ny solika dia angovo sy hery manampy antsika, io no aina mamelona antsika. I Jesoa izany aina izany ka amin'ny alalany sy miaraka Aminy no handraisantsika ny sakramenta: ny Batemy, ny Fampihavanana, ny Eokaristia, ny Fankaherezana izay hivelomana ny maha-Kristianina antsika. Koa raiso izy ireny mba hanomanantsika dieny izao ny fiainan-ko avy. Aoka hanana solika feno mandrakariva isika, izany hoe feno ny fahasoavan'Andriamanitra mandrakariva ka na dia tonga tampoka aza ny mpampakatra dia efa vonona isika miditra ao amin'ny fiadanana sy hafaliana ary hasambarana. Tsy amin'izay ihany fa dieny izao isika dia efa mivelona an'izay satria izany no maha-Kristy mpiara-belona amin'olona antsika.

Ry Kristy zokinay ô, tsy mitsahatra tokoa lanao no miantso anay hanatona Anao. Koa enga anie izahay tsy ho varimbariana amin'ny rendrarendran'izao tontolo izao fa indrindra ny tanora ka haka tahaka an'ireny virjiny adala ireny. Enga anie izahay ho tahaka ny virjiny hendry hahay hameno

mandrakariva ny solikay dia tsy inona fa ny Fanahinao masina manentana anay. Ny fahasoavanao vokatry ny sakramenta raisinay anie hanampy anay ka ho vonona mandrakariva izahay handray Anao rehefa tonga linao hampiditra anay amin'ny tena fiadanana sy hasambarana mandrakizay ao Aminao. Masina Maria Reny, tianao ho voavonjy izahay rehetra, ampianaro izahay hameno ny solikay amin'ny alalan'ny vavaka, fandraisana ny Sakramenta, amin'ny alalan'ny asa fitiava-namana, fivelomana ny asa maneho ny famindrampo tahaka anao ka hahatonga anay ho Tabernakala velona tahaka anao. Md Josefa Ray Mpiaron'ny Eglizy mivavahà ho an'ny fianakaviana hivahatra amin'ny finoana mba tsy voafitaky ny rendrarendra, tsy ho lany solika amin'ny ezaka hanarina ny Tranobe lombonana. Amen

Mompera Arserveka Mgr Benjamin Ramaroson